



Fasnacht 2022 Binggis

«Mir sin drby – Ferie im Wältall»

Wenn aggtuell wotsch Ferie plaane
Waisch maischtens nit genau wo aane
Isch es sicher an e Ort go zfliege
Ohni grad e Virus zgrieger?
Oder mainsch de bisch im Paradyys
Drby goht s de arme Lütt dört myys
Hoggsch uss Verseh uff eme Vulkan
Isch das au nit grad dr Wahn
In andere Länder würdsch kai Hotel grieger
Will sich die grad bis uff s Mässer bekrieger
Zue guete alte Tourischte Zytte
Isch me uff Dubai uff Kamel go rytte
Bisch ans Meer go s Fudi dungge
Und vyl Gäld zahlt an die Halungge
Anstatt e Himmelbett im Bungaloo
Hesch e Pritsche im Hotelbungger bikoo
Uff die Art Ferie mache isch nit toll
Drum hänn vyl vo däm jetzt d Naase voll

Dr Trend goht ganz klar in d Modärne
S Motto haisst jetzt: «Ferie unter Sterne»
Könntsch maine die hänn jetzt voll dr Knall
Aber dr Raisehit sinn Ferie im All
Als übermuetigi All-Tourischte
Hoggsch in sonere Raketekischte
Ewägg vo däre schlimme Wält
E Rais ins All für vyl Schwyzergäld
Das syg kai Probleem, wie me vernimmt
D Hauptsach isch, dass d Kasse stimmt.
Die Rakete fliege schynt au ganz ellai
Und wenn Glügg hesch, kunnsch au wider hai

Drum isch unser Motto: «Mir sinn drby!»
Und sage s drum grad gly
Am Aafang gitte e grosse Knall
Und scho sinn mr wie dr Blitz im All
Ewägg vo Sorge und Corona
Föhn mr s Lääbe eso grad neu aa
Mir mache Fasnacht uff em Mars
Und kömme gar nümm zrug, das wars!

Buebe und Maitli ab em 7. Altersjohr könne in dr Pfyffer- und Drummelschuel vo dr VKB gratis e halb Johr go schnubbere. Dr VKB-Käller isch an dr Clarastroos 57. Aamälde ka me sich unter: www.vkb.ch oder über jungi@vkb.ch.

Übrigens: Cliqueluft schnubbere kasch au am Samschdig, 19. Merz ab de 10i am Morge an verschiedene Ort im Glaibasel.
#AuFürDi – Drummler und Pfyffer im Glaibasel. E Aggtion vo Glaibasler Clique.

